

Dunando inicio na nos Luna Cultural:

A honra 3 baluarte cu busto dilanti di UNOCA

**E tres bustonan dilanti di oficina di UNOCA.****Padu Lampe hunto cu Lio Booi dilanti di e bustonan.****E dos baluartenan hunto cu Minister Hooyboer-Winklaar y demas invitadonan na e develo.****Sr. Lio Booi, Sr. Padu Lampe, hunto cu Minister di Asuntonan Economico, Cultura y Social, Michelle Hooyboer-Winklaar.**

ORANJESTAD - Luna di maart ta uno sumamente special pa henter e pueblo di Aruba, ya cu ta dedica e luna completo na tur e celebracionnan y e eventonan cultural cu ta relaciona cu nos pais. Pa duna inicio oficial na e luna di celebracion aki, diabierna ultimo, UNOCA a haci e acto oficial di develo di e monumentonan di 3 baluarte Arubiano, ta trata di e bustonan

di Padu Lampe, Hubert 'Lio' Booi y Rufo Wever (q.e.p.d.). Minister di Asuntonan Economico, Asuntonan Social y Cultural, Michelle Hooyboer-Winklaar, tabata presente na e acto oficial aki y a keda hopi satisfecho y contento cu e iniciativa di UNOCA aki y ta sigui apoya tur iniciativa cu ta contribui na e gran celebracion di nos luna cultural. Nilda Koolman di UNOCA a

hiba palabra y a splica e motibo tras di e iniciativa aki na tur presente. "Nos ta duna inicio di e luna cultural, popularmente conoci como nos luna di Himno y Bandera, cu presentacion di monumento di 3 baluarte cu a cubri varios tereno cultural, sea como musico, pintor, autor, poeta, etc. Un monumento pa honra 2 di 3 compositoran di nos dushi himno, cu ainda ta activo riba e tereno cultural. E monumento aki no ta solamente pa brinda homenahe na e 3 baluartenan aki, pero tambe ta un forma pa documenta un parti di nos herencia cultural, specialmente pa e generacion hoben y esunnan den futuro, p'asina nan tambe conoce nos baluartenan y traspasa e historia di un genero pa otro. Esey ta loke UNOCA kier contribui na dje".

E obra maestral aki ta un creacion di Maritza Erasmus y e pedestal ta crea pa un otro artista y realisa pa Dadu Croes y Martin Bermudez. UNOCA a opta pa haci e bunita obra aki riba un baranca cu ta movibel, pasobra tin entendi cu tin un plan den futuro pa traha un plasa cultural pa honra e 3 baluartenan aki y UNOCA sigur lo brinda tur sosten pa ehecuta e plan valioso aki. Nilda Koolman a haci un bunita referencia di e palabra 'cordialidad', cu ta bin den e di 3 couplet di nos dushi himno. El a cita un parti di e buki di Hubert Booi, unda cu e ta uza e palabra 'cordialidad' y ta pone un nificacion mas profundo di esaki. Segun e cita di Hubert Booi, e ta referi cu nos

**Minister Michelle Hooyboer-Winklaar durante su discurso.**

no mester ta solamente 'cordial' cu nos turistanan, pero cu nos mesun hendenan tambe. Nos tin cu ofrece cordialidad na tur momento di dia, demostrando nos aprecio, ayudo pa otro y respet, specialmente den e temponan actual, unda cu tecnologia ta domina y cu e contacto personal a bay hopi perdi. Ta un bon momento pa duna mas contenido na e palabra 'cordialidad', cuminando specialmente den e luna proclama como luna cultural. Maritza Erasmus a elabora hopi corto riba su trayectoria di crea e bustonan aki y a indica cu el a encontra varios reto na caminda, specialmente cu e busto di Rufo Wever, cu ta un persona cu e no conoce y ta a base di diferente potret el a crea e monumento aki. Su experiencia tabata algo unico, ya cu el a haya e tarea aki uno hopi special y bunita pa haci.

E concepto tras di e pedestal, pues e baranca cu e tres baluartenan aki, ta pa trece tur e elementonan di nos pueblo, cu ta den nos dushi himno, den un forma visual dilanti. Un creacion cu diferente tipo di piedra pa refleta e diferente luganan di Aruba y hunto ta crea un pueblo. "Nos ta dedica atencion na nos pais, na e simbolonan cu ta identi-

fica nos dushi pais y si antes Aruba por a celebra su Dia Nacional riba un dia so, awendia nos ta realisa cu esey ya no ta e caso mas, pasobra nos tin hopi motibo pa celebra y p'esey nos a proclama e luna di maart, como nos luna nacional. Nos a duna honor na 3 baluarte y sigur nan tin gran importancia den nos historia di cultura y mi kier duna UNOCA un caluroso pabien pa e bunita iniciativa aki. Na tur esunnan cu a traha riba e pida arte aki, un pabien, paso boso ta engrandece nos cultura y ta percura pa nos historia keda bibo pa hopi tempo mas. Probecando e momento aki, mi kier comparti un noticia nobo cu boso, cu otro siman nos ta trata un ley pa ahusta esaki y ta agrega e shoco como simbolo nacional di nos pais. E luna di maart ta definitivamente yen, cu diferente actividad cultural tanto pa grandi como chikito y p'esey desde awe, mi ta encurasha tur hende pa participa mas tanto cu ta posibel na e eventonan cultural den luna di maart, nos luna cultural, ya cu e ta importante pa cada un di nos ta aporta na esaki y nos ta refleta e celebracion aki", asina Minister Michelle Hooyboer-Winklaar a termina su discurso dilanti oficina di UNOCA. □